



Inatsisartut

*Aningaasaqarnermut Ataatsimiititaliaq
Finansudvalget*

Ulloq/Dato: 30. september 2010

J.nr.: 01.31.06/10-00495

Aningaasaqarnermut Naalakkersuisoq

Aningaasaqarnermut Ataatsimiititaliap suliaq nr. 01.31.06/10-00495 pillugu sisamangornermi ulloq 30. september 2010-mi aalajangiineranik Naalakkersuisunut ilisimatitsineq.

Meeqqanut inuusuttunullu tunngasunik immikkut suliniuteqarnissaq siunertaralugu Peqqinnissaqarfimmum ilassutitut aningaasaliinissaq

Naalakkersuisut **inassutigaa**,

- kontomi pingaarnermi 34.11.03-mi, Dronning Ingridip Napparsimmavissuanut tunngasumi, aningaasaliissutit 702.000 kr.-inik amerlineqassasut
- kontomi pingaarnermi 34.11.01-imi, Napparsimasut nunani allani katsorsarneqartarannut tunngasumi, aningaasaliissutit 1.500.000 kr.-inik amerlineqassasut
- kontomi pingaarnermi 30.10.45-mi, Meeqqanut inuusuttunullu immikkut ittumik suliniutinut tunngasumi, aningaasaliissutit 2.202.000 kr.-inik ikilineqassasut.

Aningaasaqarnermut Ataatsimiititaliap oqaaseqaatai

Meeqqanut inuusuttunullu sammisunik peqqinnissakkut suliniutit arlallit aallartinneqarnissaat siunertaralugu aningaasanik isumaginninnermik suliassaqarfimmit peqqinnissamik suliassaqarfimmum nuussinissaq Naalakkersuisut suliama matumani qinnutigaat. Paasissutissiissutigineqartut naapertorlugit aningaasat nuussat meeqqat nakorsaata sapaatip akunnerini 12-ini sinerissami siunnersortitut angalanissaanut, meeqqanut tarnip nakorsaata aammalu tarnip pissusaanik ilisimasallip sapaatip akunnerini pingasuni siunnersortitut angalanissaanut kiisalu meeqqat inuusuttullu 30 missaannut naatsorsuunneqartut utaqqisutut nalunaarsorsimasut tutsarinnerulersinniarlugit suliaritinnissaannut atorneqassapput.

Qinnuteqaat Aningaasaqarnermut Ataatsimiititaliamit naapertuuttutut isigineqarpoq, tamatumani ataatsimiititaliamit iluarisimaarlugu oqaatigineqassalluni meeqqat inuuniarnikkut atugaannut sammisumik suliniutinut atugassatut aningaasaliissutaaqqaartut suliniutissatut matumani siunnersuutigineqartut aqutigalugit aningaasaliinermi aallaqqaammulli anguniagaasunut naapertuulluurtumik atorneqassasut.

Ataatsimiititaliamilli oqaatigineqassaaq tusarniaaneq pillugu isummernissamut tunngavissiami immikkoortoq missingersuusiornermut malittarisassaaq 2008-meersoq naapertorlugi ilusiligaasimangimmat, tassa tusarniaaffigineqartut oqaaseqaataasa ilanngunneqarsimanerat allassimangimmat tusarniaanermilluunniit akissutit allatigut nassuiaatigineqarsimangimmata. Tusarniaaffigineqartut tamarmik oqaaseqaataasa tamakkiisumik ilanngunneqarsimanissaat ataatsimiititaliamit **naatsorsuutigineqartoq** oqaatigiitigalugu amigaatip tamatuma Naalakkersuisut allattoqarfiannit K-gruppemilluunniit malugineqarsimanginnera tupigusuutigigamiuk ataatsimiititaliap oqaatigissavaa.

23. september 2010-mi allagaqarluni, tassa qinnuteqaatip matuma suliarineqarnissaa ullunik tallimanik sioqqullugu, Aningaasaqarnermut Naalakkersuisup Aningaasaqarnermut Ataatsimiititaliamut allakkatigut oqaatigaa Naalakkersuisut Aningaasaqarnermullu Ataatsimiititaliap atugassaannik isummernissamut tunngavissiornissamut pisortatigoortumik maleruagassat siunissami tamakkiisumik malinneqartarnissaat naatsorsuutigineqartoq, tassa tunngavissiat taamaattut malitassaq aalajangersimasoq malillugu suliarineqartalissammata (Suliaq nr. 01.31.06/10-489). Tunngavissatut pigineqartut aallaavigalugit oqaatigineqartariaqarpoq isummernissamut tunngavissiat allaffissornikkut piginnaanilimmit misissorneqartarnerat taamatut malitassamik aalajangersimasumik atuinermik taarserneqarsinnaanngimmat.

Aningaasaqarnermut Ataatsimiititaliap aalajangiinera

Naalakkersuisut inassuteqaataat Aningaasaqarnermut Ataatsimiititaliamit **akuerineqarput.**

Aningaasaqarnermut Ataatsimiititaliap sinnerlugu

Naaja Nathanielsen
Aningaasaqarnermut Ataatsimiititaliap siulittaasua